

Uummannami Upervavimilu eqqakkanik ikuallaavimmik pilersitsisoqarsinnaanera pillugu apeqquteqaat aallaavigalugu oqallisissiatut siunnersuut.
(Inatsisartunut ilaasortaq Knud Kleemann, Atassut)

Akissuteqaat

(Aalisarnermut, Piniarnermut, Nunalerinnermut, Imminut Pilersornermut Avatangiisinullu Naalakkersuisoq)

Naalakkersuisut oqallisissiamik siunnersuuteqartumut qujapput. Kommune-nit taakkuupput eqqagassalerinnermut akisussaasut, eqqakkat katersornissaat peernissaallu akisussaaffigalugit.

Naalakkersuisut kommune-ni eqqakkanut suliaasaqarfimmi ilungersunartut ilisimavaat. Taamaammat Avatangiisinut Naalakkersuisup eqqagassat pillugit borgmester-it peqatigalugit ataatsimeeqatigiillat-taarnerit ingerlatilersimavaat. Ukkatarineqarpoq eqqakkanik ikuallanneqarsinnaasunik suliaqarnermi assartuinnermilu qanoq kommune-t aqqiissuteqarsinnaanerat.

Ataatsimoorussamik Naalakkersuisut Esani A/S-imi ikuallaaveqarneq innersuussutigalugulu taparserpaat. Ataatsimoorussamik ikuallaaveqarnermik aqqissuussamik pilersitsineq, ilaatigut eqqagassat pillugit Naalakkersuisut periusissiamik pilersaarusiarnut 2020-2031-mut anguniagassaannut ilaavoq. Ikuallaaviit marluk pilersinneqarnerisa siunertaraa pitsaasumik eqqagassanik passussinissaq, avatangiisinut peqqissutsimullu illersuisumik, aammalu eqqakkanik atoqqiinnikkut atorluarneqarnissaanut soorlu nukissiuuteqarnermut isumalluutiginissaat siunertaralugu.

Uummannami Upervavimilu ikuallaavinnik pilersitsinissamut siunnersuuteqarneq Naalakkersuisut aqqiissutissaasorinngilaat. Ikuallaaveqqanik ingerlatsineq nalinginnaasumik avatangiisimut peqqissutsimullu innarliutaanngitsumik ingerlatsinissamut naapertuutinnngimmat. Aammattaaq dioxin-imik allanillu akuerineqanngitsumik akuutissanik navianartunik aniasoqarnissaa aarlerinaateqarlunnarmat. Misilittakkat takutippaat, ikuallaaviit mikisut ataatsimoortumik ikuallaaveqarnermut sanilliullutik eqqakkanut ton-inut ataatsinut sanaartornermut ingerlatsinermullu aningaasartuuteqarfiunerungaatsiartartut. Eqqagassalerinnerup aningaasalersorneqarneranut mingutsitsisup akiliisarnera tunngavigineqarpoq. Aningaasartuutit annertunerulertussaapput tamannalu innuttaasut akiliutissaannut qaffatsitsissaaq. Taamaattumik aqqiissutissanik aningaasaqarnikkut piujuartitsiffiusinnaasunik toqqaasoqarnissaa pingaaruteqarpoq.

Sisimiuni Nuummilu eqqakkanut ikuallaaviit nutaat marluk avatangiisinut tungatillugu Naalakkersuisut akuerinikuaat. Eqqakkanik ikuallaaviit avatangiisinut akuersissutigineqarnerani ilaatigut, teknikip pissarsiarineqarsinnaasup pitsaanerpaap BAT-ip atorineqarnissaa tunngavigineqarpoq. Kommuni ikuallaavinnik nutaanik pilersitsiniaruni imaluunniit maannakkut ikuallaaviusut ingerlatiinnassagunikkut, Sisimiuni Nuummilu ikuallaaviit nutaajusut avatangiisinut illersuinissamut piumasaqaataasut assigisariaqarpaat.

Eqqaaneqareersutut Avatangiisinut Naalakkersuisup tullerijiarinnermini eqqagassat pillugit borgmester-it ataatsimeeqatigillattaarneri aallartisarnikuuaa. Naalakkersuisut naatsorsuutigaaq suleqatigiinneq ingerlanneqaannassasoq. Tamatuma saniatigut Naalakkersuisut Politikikkut Ataqtigiiisaarisooqatigiit ataatsimiilerpata eqqagassalerineq eqqartorneqarnissaa pilersaarutigaaq. Suliniutit aallartisarneqarput ataatsimoorluta eqqagassalerinnerup avatangiisimut peqqissutsimullu isumannaatsumik isumagineqarnissaat qulakkeerniarlugu.

Taamatut oqaaseqarluta siunnersuutip oqallisigilluarneqarnissaa Naalakkersuisut qilanaaraat.

5. juni 2025

UKA 2025/121

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

Uummannami Upernavimmilu eqqakkanik ikuallaavimmik pilersitsisoqarsinnaanera pillugu apeqquteqaat aallaavigalugu siunnersuut

(Inatsisartunut ilaasortaq Knud Kleemann, Atassut)

Avannaata sumiginnarneqarnerujussua naammaqaaq!

Nunatta avannaa sinerissap sinneranut sanilliullugu nipaanneroqaaq, naak sorparujussuartigut annertoqisumik katataaqqangaluarluni, aali uani maanna eqqakkanik suliaqarneq kisiat eqqartorneqarniartoq, qanorli angallannikkut sanaartornikkullu tunngassuteqartut eqqartorneqartuuppatattaq.

Ukiut tamarluinnaasa eqqakkat katersorneqartut poortorneqarnikut sikuunerani tulukkanik ammaaterneqarlutik teqqartut, aasanerani niviungassuit illoqarfik aneerfissaajunnaajusallugu, eqqakkat imaanut nakkaasut, illoqarfiup iluanut teqqartut, ikuallaagallarsinnaanermut piumasaqaatit ingattarsingaaramik angumasassaanngigajattut.

Ila iluarsisariallit taajugassagut amerlaqaat!

Ikerasammiit Ukkusissanut, Upernavik Kujallermiit Kullorsuarmut, nunaqarfippassuit avannaani eqqakkatigut assorsuaq unammillernartumik inissisimapput, sooq tamanna taamaattussarineqaannassua?

Esani sikusanngitsumiikkaanni torrassoopasippoq, taannali nunatta qeqqaniit kujasinnerusumut tulluurtumik ilusilingaavoq, sikusartunut tulluanngilaq.

Eqqartorsinnaannginnerparput maanna pimoorussamik Uummannap Upernaviullu namminneq nutaaliaasunik ikuallaaveqalersinnaannginneri? Kiassarnikkut innaallagissiornikkullu tapertaasinnaasussanik, immaqalu siunissami naluttarfeqalersinnaanissaannut kissamik tunioraasinnaanissamut atorluarsinnaasumik. Ajoranqaarmi ukiut tamarluinnaasa eqqagarpassuit talittarfinnut tunisassianik assartuiniarnermi atorneqartartunuttaaq aqqunneqartarput, umiarsuarnut ikineqassatillutik, ila tamanna nunani allani pisisartutta paasisuuppasuk nunatsinnut ajunaarnersuartut ittumik tunisassiornikkut kinguneqassagaluarpoq, tamanna aamma utaqqiinnarniarnerparput?

Oqallisigilaartiguli maanna politikkikkut qanoq tamanna aqqiivigineqarsinnaanersoq, qanorlu ililluta pingaarnersuunikkut tamanna angusinnaajumaarnerlutigu.

Oqallilluarisi.